





續資治通鑑長編卷八十八

宋 李燾 撰

眞宗

大中祥符九年九月壬寅朔曹瑋言緣邊熟戶近爲嘉勒斯賚所誘又埒克遵輩許以名職若無羈縻或慮脅去望給以告身從之

癸卯雄霸州言界河汎溢詔本州發卒護之

甲辰兵部尙書參知政事丁謂罷爲平江節度使謂上

章請外卽授本鎮旄鉞以寵其行尋命謂知昇州謂請

歸拜墓許之

謂忽請外任當有說而實錄正史皆不載疑此未得其實也

內殿承

制閤門祇候李繼元表述其祖保大定難節度使朔方

郡王拓拔思恭仕唐剪滅黃巢賜姓父克文率族歸闕

與李繼遷本五從兄弟名同上字心實恥之願改名守  
元上嘉其志乙巳擢守元爲供備庫副使詔如聞廣  
南東西路物價稍貴宜令轉運使提點刑獄官分路撫  
卹發官廩減價賑糶獄繫多處促其裁處或有寇盜卽  
時擒捕無縱驚擾詔民負息錢者無得逼取其莊土  
牛畜以償

丙午以翰林學士陳彭年爲刑部侍郎王曾爲左諫議  
大夫權御史中丞張知白爲給事中並參知政事樞密  
直學士任中正爲工部侍郎樞密副使曾知白彭年等  
與王旦同在中書嘗乘間謂旦曰曾等拔擢至此公之  
力也願有所裨補旦曰願聞之曾曰每見奏事其間亦  
有不經上覽公但批旨行下恐人言之以爲不可旦遂

謝而已一日奏對旦退曾等俱畱上愕曰何事不與王旦同白曾等乃以前說聞於上上曰所行公否皆曰公上曰王旦事朕多厯年所朕察之無毫髮私自東封後朕諭令小事一面專行卿等當謹奉之退而謝於旦曰上之委遇非曾等所知也旦曰向蒙諭及不可自言先得上旨今後更賴諸公規益

此據王旦遺事錄附見

右諫議大

夫凌策自成都代還上將擢任之會策已病嘗謂王旦曰策有才用治益部敏而能斷旦曰策性質淳和臨莅彊濟上曰然於是命爲給事中權御史中丞

丁未曹瑋言總噶爾嘉勒斯賚蕃部馬巴咱爾岳居馘等率馬御山蘭州康古壇毛山滔河河州兵三萬餘人入寇至伏羌寨三都谷卽領兵擊敗之逐北二十餘里

斬首千餘級生擒七人獲馬牛雜畜衣服器仗三萬三千計馬巴咱爾等遁去官軍被傷者百六十人陣沒者六七十人其立功將校使臣凡百三十九人望賜酬獎詔賜瑋及駐泊鈐轄高繼忠都監王懷信錦袍金帶器幣立功者第遷一資仍賜金帛陣沒者卹其家先是翰林學士李迪召對龍圖閣命草詔書徐謂迪曰曹瑋在秦州屢請益兵未及遣遽辭州事邊將誰可代瑋者對曰瑋知嘉勒斯賚欲入寇頗窺關中故請益兵爲備非怯也且瑋有謀諸將皆非其比何可代陛下重發兵豈非將上玉皇聖號惡兵出宜秋門耶今關右兵多可會其羨益發赴瑋因問關右兵幾何對曰臣向在陝西以方寸小冊書兵糧數備調發今猶置佩囊中上令自

探取曰內侍取紙筆具疏某處當畱兵若干餘悉赴寨  
下上顧曰眞所謂頗牧在禁中未幾嘉勒斯賚果犯邊  
秦州方出兵復召問曰瑋戰克乎對曰必克及瑋捷音  
至上謂迪曰卿何料之審也迪曰嘉勒斯賚大舉入寇  
使諜者聲言以某日下秦州會食以激怒瑋瑋勒兵不  
動坐待其至是則以逸待勞臣用此知其決勝也

司馬光記

此事多差誤今  
不取並依本傳

涇原路駐泊都監周文質請令知鎮

戎軍李餘懿以所部兵赴籠竿城駐泊防護儀渭等州  
納質熟戶詔文質與曹瑋及餘懿協議而行之以渭  
州吹莽城帳族都首領張碩噶爲順州刺史大首領雅  
克沁等五人並爲本族軍主秦州永甯小洛門威遠寨  
大首領四十七人並補軍主加檢校官階勳皆獎其內

附也碩噶以兵助破裕木扎卜沁故命加等初張佶

置四門寨侵羌地羌人多叛去曹瑋招出之令入馬贖

罪還故地者至數千人每送馬六十匹給綵一端或訴

其薄瑋叱去曰聽爾贖罪尚希利耶上以瑋撫捍得宜

特詔嘉獎實錄於三月初二日載此事且云瑋破裕木扎

拒王師者皆伏匿瑋誘召之按戮尚揚丹則在三月破

裕木扎卜沁乃在九月實錄并言之於三月初誤甚矣

今削去此等語但取瑋本傳命輔臣分祈天地廟社

神祠宮觀佛寺旱故也先是中書請以工部郎中知

制誥盛度為右諫議大夫權知開封府上曰可更問王

旦旦時屬疾在告中書具聖語就問之旦曰度必不樂

此任既而度果詣中書自言幸以文字進不願處繁劇

中書并以聞上曰王旦銓量才品極當必使人各得其

所此豈可不問也於是樂黃目以兵部員外郎知制誥兼會靈觀判官屬辭淹緩朝議不以爲稱職乃授黃目右諫議大夫權知開封府改命度爲會靈觀判官知制誥如故黃目初召試上以黃目久任外官止試制誥二篇入西閣不一月遂罷

戊申詔自今參知政事樞密副使宣徽使立位並以先後爲次 侍御史李行簡使陝西還言關外蝗傷民田登實者十之七 虢州言飛蝗越境秋稼豐茂

己酉命樞密直學士工部侍郎薛映爲契丹國主生辰使東染院使劉承宗副之壽春郡王友戶部郎中直昭文館張士遜爲正旦使供備庫使王承德副之映士遜始至上京自中京正北八十里至臨都館又四十里至

官窑館又七十里至松山館又七十里至崇信館又九  
十里至廣甯館又五十里至咸甯館又三十里度潢水  
石橋旁有饒州蓋唐朝嘗於契丹置饒樂州也今渤海  
人居之又五十里至保和館度黑河七十里至宣化館  
又五十里至長泰館西十里許有佛寺民舍云卽祖州  
亦有祖山山中有按巴堅廟所服鞞尙在長四五尺許  
又四十里至上京臨潢府自過崇信館卽契丹舊境蓋  
其南皆奚地也入西門門曰金德內有臨潢館子城東  
門曰順陽入門北行至景福館又至承天門內有昭德  
宣政二殿皆東向其廬亦皆東向臨潢西北二百餘  
里號涼淀在漫頭山南避暑之處多豐草掘丈餘卽堅  
冰云

劉承宗知信子  
王承德審琦子

以太子右贊善大夫高志甯爲

供備庫副使知忻州賜紫袍銀帶志甯時獻封事上曰  
朕聞其知兵而未嘗言故命換秩任以邊寄曹瑋言  
總噶爾昨遣馬巴咱爾率兵到大小洛門脅誘熟戶尋  
呼集令納質於永甯寨有隆博圖沙瑪二族不至臣在  
城假牒請高繼忠王懷信領兵招換續得繼忠等報二  
族合眾拒戰破馬巴咱爾斬首二百餘級晚度渭河水  
漲失道爲蕃眾所襲溺死者二十五人傷死者百人  
庚戌以不雨罷重陽宴利州言水漂棧閣萬二千八  
百間賜監修使臣役卒緡錢涇原路走馬承受麥永  
慶言嘉勒斯賚率蕃族人馬至青雞李子筆策川駐泊  
都監周文質王應昌領兵戍瓦亭寨防遏之賊尋夜遁

去

賊夜遁據  
應昌本傳

癸丑并州言秋稼豐稔蝗不爲害

甲寅上作詩賜新授參知政事陳彭年 令諸路轉運

使督民焚捕蝗蝻無使滋育李士衡等言河北南郊賞  
軍紬絹綿承前並自京運送今本部所積頗多望許充  
賞給詔天雄軍相衡貝博等州物帛依舊輸內藏庫白  
餘從之 時以愆亢有龜山僧智悟請就開寶寺福聖  
塔斷左手祈雨是日雨降自秋不雨上憂形於色減膳  
徹樂徧走羣望及是霑沛中外忻慶分遣官致謝於所  
祈處上作甘雨應祈詩近臣畢和

丁巳徙兩浙轉運副使都官員外郎楊埴知歙州埴庭  
瑋子在職不能清謹故也又令中書戒諭之 詔諸州  
蝗旱今始得雨方在勸稼所宜省事常制務假其更延

一月八年以前婚田未得受理俟豐稔如故凡諸營造  
悉罷之曹克明等言撫水蠻人雖已伏罪其擄鈔人  
口器械悉未歸納請益兵討之卽詔克明等曰昨奏用  
澄海軍及募丁壯可以平賊又俞獻可言蠻人去邊止  
二三日程發軍掩襲速可蕩定朝議慮其輕敵續遣禁  
軍濟之且與舉甲兵尤當謹密風聞汝等期以此月深  
入又令九州巡檢開路俟蠻人出卽畱之騰說如此彼  
必爲備動關利害無失機宜苟道路艱險難於進討但  
攝其酋領索所掠生口因而撫之亦汝之功矣時克明  
與楊守珍領軍入環州樟嶺路馬玉與內殿崇班王文  
慶趨宜州西路王文慶據撫水蠻傳則與玉爲並安撫  
但舉其官當考又令宜州都巡檢程化鵬取樟嶺西古牢隘路

會合化鵬遇蠻於上房兩水口擊破之文慶玉至如門  
團爲蠻所扼不能進克明守珍乃過橫溪思德寨召山  
獠嚮導開路進師蠻依篁竹間時出戰鬪輒敗走旬餘  
上黃泥嶺杉木隘路溪谷險邃蠻據要害以拒官軍至  
午大潰其黨遂過霸苑抵帚洞乃入中房前村克明等  
頓兵下寨中夕羣蠻大譁譟擊鉦鼓攻寨甚急出兵擊  
之傷殺頗衆因縱火焚其廬室積聚自此恐懼竄入山  
谷又緣龍江南岸而東至昏暮過石峽隘險士不並行  
蠻復連弩北岸克明遣猛士步與鬪至卽退走寨於下  
房博賀村克明設伏寨外其夜蠻衆復大集遇伏發與  
寨兵合擊追斬殆盡乘勝搜山悉得馬牛士卒克明等  
知其窮蹙乃曉諭恩信許以改過於是酋帥蒙承貴等

面縛詣軍自首克明厚加犒宴且數責之皆俯伏謝罪  
及聞詔旨赦令勿殺莫不泣下北望稱萬歲悉還所掠  
漢口資蓄乃歆猫血立誓自言奴山推到龍江西流不  
敢復叛勒銘奴山後二日遇文慶及玉於如門寨遂還  
軍宜州蠻人納器甲凡五千數願遷漢地者七百餘口  
詔分置廣西及荊湖州軍賦以官田獻可等又言殿直  
蒙肚知歸化州州與撫水相接數遣其子文寶及妻族  
甘堂偵軍事又其子格與官軍鬪敵悉部送赴闕有蒙  
隻者亦肚之子先嘗告賊署爲昭州押牙並黥配登萊  
州克明入撫水州不得其日月日據克明正傳云是冬  
按詔書云九月深入又克明傳云月餘乃至撫水州  
約其時蓋秋宋舉兵冬初平賊也今附見詔書後詔書  
以丁巳降丁巳九月十六日也徒配蒙肚父子實錄在  
十一月癸卯  
今亦附見

戊午申禁諸路貢瑞物時遼州獻白兔荆門軍獻綠毛龜故也

己未詔諸州縣七月已後訴災傷者準格例不許今歲蝗旱特聽受其牒訴太常少卿李應機言廣南勾當市舶司使臣自今望委三司使副判官或本路轉運使奏兼幹者充選從之

博州蝗旱民有訴而州縣抑輸常賦運司不爲之理庚申詔遣官按視卽蠲之上謂輔臣曰平定軍等處運糧採木始勞百姓後役軍士今山路漸遠多致亡逸大率臨事罕能酌中以愛民爲心者不恤士卒以士卒爲任者罔念蒸庶此實蠹政之本也河東安撫司言管內粟豆斗直十九錢

壬戌卽部川山前後百蠻都鬼王新都王黎吠遣歸德將軍趙勿婆等四十三人來貢方物會要及本傳並不載此當考癸亥詔三司使副自今同上殿奏事判官有大事亦許升殿舉舊例也

乙丑知并州周起言嵐石州皆近邊望令安撫司管勾從之

丁卯詔如聞杭州葺江岸卒執役水中苦足疾而死者甚眾宜令知州馬亮拯療之

戊辰詔外任京朝官滿三年當考課者聽附驛上狀先是羣官代還京師而本官秩滿者乃預考課其移授有累年以遷者故降是詔以宮觀成權禁公私采木石令京東西陝西江淮南兩浙荆湖等路曾經採木石處